

UJEDINJENJE NIJE SAMO RIJEČ

Znaš li, narode, da je tvoja država nekada bila tuđa? Da je kaldrmom kojom koračaš, koračalo hiljade tuđih stopa, otimajući svaki komad zemlje i neba koji je do tada postojao. Tog dana, prije 558 godina, Bosna je izgubila svoje "ja". Ni zastave, niti grba. Svaki simbol njene jedinstvenosti izbljedio je pod opsadom stranih sila. Sve do jednom. Do noći između 25. i 26. novembra, kada je historija ispisana...

Šta je to državnost? Svake godine obilježavamo praznik koji se nalazi na kraju mjeseca novembra, i ono što većina zna jeste da taj dan neće ići u školu i na posao. A jesmo li svjesni važnosti koju nosi taj dan? Da li bismo živjeli i postojali danas da se članovi delegacije sa sve četiri strane BiH nisu ujedinili jednog četvrtka u sedam navečer? Kada ste već tu, nasljednice i nasljednici svoje domovine, federativne demokratske narodne republike, nezavisne i suverene države Bosne i Hercegovine, slušajte i pamтите!

Prvo zasjedanje Zemaljskog antifašističkog vijeća narodnog oslobođenja Bosne i Hercegovine, poznatijeg pod kraticom ZAVNOBiH je počelo 25. novembra 1943. godine u 19 sati, u Mrkonjić-Gradu. Trajalo je sve do četiri ujutro narednog dana. Ovim događajem, izražena je odlučnost naroda BiH da njihova zemlja bude i srpska i muslimanska i hrvatska, kao zbratimljena zajednica koja pruža punu ravnopravnost svakoj nacionalnosti podjednako. Tačke dnevnog reda su bile brojne, ali historijski najbitnija jeste ona pod nazivom *rezolucija*, koja je predstavljala težnju za obnovom državnosti Bosne i Hercegovine, te njenu ravnopravnost u okviru Jugoslavije. Sada se sigurno pitate, kako je došlo do odluke da BiH bude ravnopravna država?

Prvo zasjedanje ZAVNOBiH-a nije bilo isključivo u svrhu odlučivanja državnosti, već i uređivanja dodatnih, tehničkih aspekata koji se dotiču države kao organizirane društvene jedinice. Šta to znači? Vijeće je odabralo svoje vijećnike, Prezidijum i Predsjedništvo, istovremeno se proglašavajući vrhovnim političkim predstavnikom BiH, prema važećem pozitivnom pravu. Ustanovljena je država kao ravnopravna federalna jedinica u okviru "nove" Jugoslavije, dok je ZAVNOBiH sam po sebi, u praksi postao vrhovni zakonodavni i izvršni organ vlasti Federalne Države Bosne i Hercegovine. Politička i društvena struktura naše domovine je u konačnici bila obnovljena.

Državnost, ujedinjenje, to nisu samo riječi, ispisane na papirima poredanim na policama historijskog arhiva. To su momenti spajanja progonjenih naroda u jednu jedinstvenu cjelinu. Najsnažnija jugoslavenska zemlja, ostavljena nama u naručje još od doba Tvrtka I, koju su 1463. pokorile istočne sile, je vratila svoj sjaj i autentičnost. Pravično je zatvorila vrata prošlosti, promijenila sadašnjost i

osigurala sigurniju budućnost. Temelj države u obliku srca je postao čvršći, a njena uloga značajnija. Naposljetku, Bosna i Hercegovina je uspjela obnoviti sebe i svoje "ja".